

lis Gnovis

■ UDIN. Lote pal «Teatri Stabli»

La lungje lote di Nico Pepe par meti sù un vèr «Teatri Stabli Furlan», ai 19 di Jugn, e je stade rivoçada li de sale dal Consei comunâl di Udin, dulà che il dissepul dal grant atôr e regist, Bepi Agostinis, ch'al è chel che cun plui costance e determinazion al à puartât indevant l'ereditât dal mestri, al è stât ricevût de Comission Culture dal Comun. Agostinis al à fat la storie dal ricognossiment de dignitât dal teatri furlan e al à batût suntuin ûs cuotidian de lenghe, par no ch'è sedi dissipade la musicalitât dal furlan e la sò varietât espressive. Al artist udinês i à pandût l'agrât de Patrie il sindic Pieri Fontanin e i puartevoês di ducj i sogjets ingaiâts tal proget dal «Teatri Stabli Furlan» («Academie d'art drammatiche Nico Pepe», «ARLeF», «Istitut Pre Checo Placerean» e «Societât Filologjiche», «Teatro Nuovo Giovanni da Udine»).

■ TRESESIN. 40 agns in musiche

La Corâl «Vôs de mont» di Tresesin e finis 40 agns. La fieste grande pal storic inovâl e colarà sabide ai 29 e domenie ai 30 di Jugn. La prime zornade di celebrazions e larà indevant cun chest calendari: a 18 messe dapruf de glesie di San Pieri (o ben tal domo, s'al sarà trist timp); a 20 conciert dal cuarantesim, li dal domo; a 22.30 cene ufierte de Corâl li dal Parc pes fiestis di Tavagnà (si scuen prenotâsi tal lûc internet www.vosdemontshop.it; o cu la pueste eletroniche coro@vosdemont.it o cul numar telefonic 351 5626633). Domenie, la fieste e larà indevant sui prâts dal Montâs. La zornade «Sui prati sotto Sieris» e tacarà a 11; a misdi conciert cun ducj i coriscj invidâts (www.vosdemont.it/quaranta.html) e po gustâ comunitari.

■ BIRMENS DORF (CH). Misurâ i compartaments

La Comission internazionâl pe protezion des Alps «Cipra» ur propon a ducj i abitants des montagnis europeanis un scandai par misurâ i siei compartaments e par imparâ a vivi in formis plui rispeticos de nature e dal ambient. Su la rêt des rêts, in dutis lis lenghis, si podarà compilâ fin a la fin dal mès di Jugn il scandai eletronic «Stili di vita sostenibili nelle Alpi», ch'al scrutine il mût di mangjâ, di vistîsi, di là ator des fameis alpinis e dulà ch'a son a stâ. I risultâts finî dal scandai, ch'al è sometût a la direzion <https://wikisurveys.com/s/WUHLJAN9>, a saran publicâts tal lûc internet www.cipra.org/vita-sostenibile.

■ LIGNAN. E cres la Galerie dai Mosaics

Il setim «Simposi di Mosaic» al è finît ai 15 di Jugn, cu la presentazion de «Bandiere inglese», li dal Stabliement balnear numar 3. Lopare, gjavade fûr di un'idee dal architè Marcello D'Olivo, e je stade interpretade des arlevis dal Cors di perfezionament de Scuole Mosaiciscj dal Friûl di Spilimberc Martina Amato, Darina Baimuratova, Silvia Biancolino, Sara La Fiura, Elenalucia Maggiolet e Alina Sakharova, direzudis dai mestris mosaiciscj Luca De Amicis, Cristina De Leoni e Serena Leonarduzzi. In grazie di chest proget, prudelât de «Societât Lignano Pineta», tai ultins agns, a son stâts decorâts vie pal 2016 il Stabliement 7 cu la bandiere austriache disegnade di Gianni Borta; vie pal 2017 il Stabliement 4 cu la bandiere taliane ispirade di Giorgio Celiberti; e vie pal 2018 il Stabliement 5 cu la bandiere de Svizra, progetade di Luigi Del Sal.



Joibe 27	S. Sanson	Lunis 1	S. Colombe di Osôf
Vinars 28	Sacri cûr di Jesù	Martars 2	S. Bernardin
Sabide 29	Ss. Pieri e Pauli ap.	Miercus 3	S. Tomâs
Domenie 30	Ss. Prins martars	Il timp	Temperaduris altis



Il soreli
Ai 27 al iève aes 5.18
e al va a mont aes 21.02.



La lune
Ai 2 Lune gnove.

Il proverbi
Cui ch'al compre cence podê al vent cence volê.

Lis voris dal mès
Se al covente, cimait i fasui rampighins
e lis favis cuant che a à la rose.

La Leç pai Bens comuns

Si pues firmâle
in ducj i Municipis
de Patrie

Si pues firmâ in ducj i Municipis, fintremai ai 30 di Lui, la Propueste di leç d'iniziativa populâr ch'è smire di otignî, tal ordenament statâl, il prin vèr ricognossiment dai Bens comuns, a pâr dai Bens publics e dai Bens privâts, ch'a son bielzà contemplâts tant te Costituzion che tal Codiç civil.

La grande rivoluzion in materie di proprietât e je prudelade di chei academics e di chei moviments de societât che no si son mai altri rassegnâts al faliment dal procès inviât dal 2007 de «Comission Rodotà». In chê volte, e risultave clare la necessitât di superâ la vision tradizional, ridutive e insufficiente, di proprietât, precisant la categorie juridiche dai Bens comuns, ch'a son ducj chei Bens ch'a partegnin a la coletivitât (e duncje no a une persone bessole e nancje a un cualsei Ent public) e ch'a coventin par podê gjoldi dirits fundamentâi.

Ma il telâr di Leç che il grop coordinât di Stefano Rodotà al veve prontât za fa 12 agns nol è mai stât discutût dal Parlament, nancje cuant che il dibatiment sui Bens comuns al jere rivât al colm dal interès populâr, te stagion dai Referendums dal 2011 cuintri da la privatizazion dal Servizi idric e pal ricognossiment de aghe juste apont come Ben comun e Diritt uman fundamentâl.

La cuistion e je stade tornade a cjapâ sù dai scuclars di Rodotà, in specialitât di Alberto Lucarelli e di Ugo Mattei, che cuntune schirie di partisans dai Bens comuns, a àn inmaneât il «Comitât populâr di protezion Bens comuns, Sociâi e Sovrans» (www.benicomunisovrani.it) e, ai 18 di Dicembar dal 2018, i àn presentât a la Cort di Cassazion, la Propueste di leç d'iniziativa populâr «Deleghe al



Vie pal 2011, mieze Italie si è mobilitade par difindi l'aghe de privatizazion

I Bens comuns
a partegnin
a la Comunitât
e a coventin
par podê gjoldi
i dirits
fondamentâi

Guvier pe modifiche dal Cjâf II dal Titul I dal Libri III dal Codiç Civil». Par che il procès legislatif al puedi fâ strade a coventin lis firmis di 50 mil eletôrs, ma i organizadôrs a intindin di presentâsi a la fin de racuelte al mancul cuntun milion di sottoscrizions, par publicâ trop centrâl ch'è je cheste cuistion. Protezi e valorizâ i Bens comuns – seont chei dal Comitât «Rodotà», che in Friûl a fasin stât sul impegn dal «Forum dai Bens comuns e da l'Economie solidarie» (www.forum-benicomunifvg.org/) – al vûl di «difindi il patrimoni naturâl e artistic, fermant chês formis di privatizazion che, dal 1990, i àn permetût al Guvier di licuidâ un patrimoni coletif di boscs, di isulis, di aghis, d'infrastruturis, di palaçs e di colezioni artistichis di 900 miliarts di euros; ma al vûl di ancje superâ l'abandon e la gjestion malderte di tancj Bens, necessaris pal benstâ di ducj i talians dal di vuê e di chei ch'a vignaran dopo di lôr.

Mario Zili

Imprenditorialitât fra Argentine e Brasil e valôrs identitaris

I furlans de Diaspore argentine Augusto Esteban Coraglia, Yenit Evelyn Gazze, Selene Araceli Gregoret, Maria Victoria Martina, Virginia Mazzuca, Nicolas Rodolfo Nanini, Carolina Soledad Patat, Dario Gabriel Pautasso, Cintia Antonela Sponton, Luciana Visintini Del Valle, cun Fernando Luigi Padoin Fontanella e Karla Ribeiro de Diaspore brasiliane, a son i zovins rivâts in Friûl ai 17 di Jugn par frecuentâ la X edizion dal cors di 150 oris «Valôrs identitaris e imprenditorialitât», inmaneade de Universitât dal Friûl (<https://sites.google.com/view/valori-identitari>)



Peraulis in dismentie par cure di Mario Martinis

❖ COPE

s.f. = nuca; coppa, scodella di legno
(dal latino *tardo cippa*, da *cippa* di origine indoeuropea)
La cope taponile simpri ben, âstu capît ce che ti dis none?
La nuca coprila sempre bene, hai capito cosa ti ha detto nonna?

❖ COPASSE

s.f. = tartaruga di acqua dolce; per designare la tartaruga di mare si utilizzava l'espressione magne copasse di mâr o copasse di rosade (anche chiamata tartarughe "tartaruga")
(derivato da cope "nuca" con il suffisso -asse)
Berte e à regalât une copasse a so nevôt.
Berta ha regalato una tartaruga a suo nipote.

❖ COS

s.m. = cestone di vimini della capacità di circa mezzo metro cubo; gerla in Carnia
(dallo sloveno *koš* "gerla, canestro, cesta, cestone")
Cul cos tu puartis ator ce che tu vûs.
Con il cestone porti in giro quello che vuoi.

❖ COSSAN

s.m. = contadino (parola friulana antica)
(continua la voce latina *quōtidiānu*)
I cossans a vignaran a taiâ il forment lunis che al ven.
I contadini verranno a tagliare il frumento lunedì prossimo.

❖ COSUL

s.m. = baccello del legume
(dalla forma diminutiva *cocila, da coclea "chiocciola", "guscio della chiocciola")
I cosui a van gjavâts se di no no tu mangjis i cesarons.
I bacelli vanno tolti altrimenti non mangi i piselli.

❖ COVE

s.f. = giaciglio, cova
(forma deverbale di covâ, che continua il latino cubare)
Ogni bestie e à la sò cove.
Ogni animale ha il suo giaciglio.